

1881, i raro i te mana o taua tekiona 17 o “Te Ture Whenua Maori, 1867,” i runga hoki i te mana o aua ota, ka tahi ka tino whakaputaina te Tiwhikete e te Kooti Whenua Maori ki a Meiha Keepa, he mea hiiri e te Kooti he mea haina e Te Tumuaaki o taua Kooti, a, ko te tikanga o taua mea he whakatu ia Meiha Keepa hei Kai-tiaki mo nga tangata kua rehitatia ra o ratou ingoa ki roto ki te Kooti kua whakahuatia ake nei.

2. I te Marama o Noema, 1886, ka tu taua Kooti ki Pamutaua Nota hei wawahi i taua poraka whenua i runga i te tono a ta koutou Kai-pitihana a Meiha Keepa; a, ki te aronga i whakahaerea taua keehi e te Kooti i runga i nga ritenga o “Nga Ture Whenua Maori” o “Te Ture Kooti Whenua Maori, 1880,” me “Te Ture Wawahi Whenua Maori, 1882.”

3. I te 25 o Noema e toru nga ota wawahi i mahia e taua Kooti i runga ano i te whakaae a nga tangata katoa nona te whenua i rokohanga ki roto ki te Kooti I taua ra.

4. I te 1 o nga ra o Tihema ka mahia etahi atu ota wawahi i runga i te whakaae a te katoa, a i runga i taua wawahanga whiwhi katoa ana nga tangata i uru ki te Tiwhikete a te Kooti Whenua Maori i tetahi wahi o taua whenua hei piihi motuhake mo ratou. Otira ko nga piihi katoa i whakataua ra kia ratou i runga i te wawahanga he whenua kapi i te ngaherehere ehara i te whenua kua nohia e te iwi o Muaupoko.

5. A te mutunga o taua wawahanga o te poraka e nga tangata nona, waiho toitu ana te wahi o te poraka i tino nohia hei kainga—tona ingoa ko Horowhenua No. 11. 14,793 eka te rahi, a kei roto i taua wahi te roto o Horowhenua.

6. I te mea kua tuturu te whakaaro o te iwi kua tenei wahi o te whenua e wawahia, engari me waiho hei kainga tuturu mo te iwi, whakamutua ana te wawahi, a, tonoa ana kia whakaputaina e te Kooti he Tiwhikete mo taua wahi ki a Meiha Keepa kia pera ano me to mua ahua.

7. I te taenga ki tenei ahua o te whakahaere o te keehi ka tu atu a Wirihana Hunia—mona ake me tona whanau—koaia tetahi o nga tangata i uru ki te Tiwhikete, ka mea kua e tuhia ko te ingoa anake o Meiha Keepa ki roto ki te ota. Katahi ka hikitia ki waho o te Kooti mo tetahi taima poto kia whiriwhiria taua mea, a, whakaae ana a Meiha Keepa kia whakaurua te ingoa o Warena Hunia (te teina o Wirihana) ki roto ki te ota, kia tu ko raua hei Kai-tiaki, a, tonoa atu ana e ia (e Meiha Keepa) ki te Kooti kia whakaurua a Warena Hunia ki roto ki te ota, a peratia ana e te Kooti, kaore kau he kai-whakahe.

8. I te whakaaetanga o ta koutou kai-pitihana kia uru te ingoa o Warena Hunia, i mahara ia e uru ana taua tangata hei hoa Kai-tiaki mona ki te whakahaere i taua poraka kia puta ai he pai ki te iwi nona te whenua; a, koi ra ano hoki te whakaaro o nga tangata katoa no ratou te poraka i rokohanga nei ki te Kooti i taua ra na ratou nei i whakaae kia tuhia taua whakariteritenga (e te Kooti), a i kore ai ratou e whakahe.

9. I muri iho i te mahinga o aua ota wawahi kua whakahuatia ake nei, ka ruritia taua whenua a mahia ana he mapi tika o taua whenua ma te Kooti. A, muri iho whakataua ana kia whakaputaina he Tiwhikete i runga i nga ritenga o Te Ture Whakawhiti Whenua.

10. I te marama o Pepuere 1890 ka tu te Kooti Whenua Maori ki Pamutana Nota, hei wawahi i runga i te tono a Warena Hunia i te whenua e mohiotia nei ko Horowhenua No. 11. Kia kitea ai to Meiha Keepa paanga me to Warena Hunia paanga. Na, no reira rawa ka mohio to koutou kai-pitihana me tona iwi kua raru ratou i tetahi whakararenga a te Ture, a, kua tino riro hei whenua motuhake mo nga tangata tokorua i whakahuatia nei o raua ingoa ki roto ki te Tiwhikete o taua whenua, a, kei a raua anake te tikanga mo taua whenua.

11. Na ko te iwi o Muaupoko e noho ana i runga i te mahara, ko o ratou paanga ki taua whenua kei te puritia e Meiha Keepa me Warena Hunia i runga i te ritenga tiaki. Na no taua ra ka mohio ratou, ahakoa ehara ia ratou i ata whakaae atu, otira i runga i te tino ritenga o te Ture kua riro noatu o ratou paanga i nga tangata tokorua kua whakahuatia ake nei, a, ko to ratou kainga o nga tupuna iho i whanau nei te nuinga o ratou ki reira, ko o ratou whare, ko a ratou mahinga, ko nga tanumanga tupapaku, me a ratou mahinga ika kua tino riro e kore e hoki mai kia ratou. Kaore kau he kupu whakatupato a te Kooti i puta atu kia ratou e mohio ai ratou ko te ritenga o taua ota he tango atu i te whenua i nga tangata kua whakaaetia no ratou, a, kaore hoki te Kooti i whakaatu atu ko te mea pai me whakapumau nga ritenga tiaki kia mau ai taua whenua ki te iwi, otira tenei kei te maharatia kaore pea te Kooti i mohio ki te tino tikanga o taua ota i hanga ra e ia, mehemea hoki i mohio, i pehea ra ia i whakaae ai kia tuhia taua ota, a kaore ana kupu whakatupato ki nga tangata e pa ana kia ratou taua mea.

12. I te tuunga o te Kooti i te marama o Pepuere, 1890, ahakoa ano te tohe a Meiha Keepa mo runga mo te tikanga tiaki i te whenua me te whakaae ano a Warena Hunia mo taua tikanga, wawahia ana e te Kooti aua whenua ano nei i puritia e nga tangata taua whenua